



二知軒文鈔卷二十五

有堂方伯家傳

吾族於順治八年由休甯遷居定遠西鄉之北爐橋而城中別  
有一支亦由休甯遷居在前至有堂方伯始顯於朝方伯與  
先大夫為昆弟行予生也晚不及見方伯得見方伯諸公子則  
已遷居金陵厥後癸丑之難方伯之六公子若夔以候補縣丞  
抗節死其孫曾輩流離轉徙江淮間若夔子書紳納貲為縣丞  
需次白門予至廣陵書紳來謁因索得方伯敬恕堂詩集蓋余  
少時所諷誦者亂後失之喜得再見珍若球璧書紳有詩才能

定遠方濬頤





世其家學少年明幹見重於上官同治甲戌予有袁江之役書  
紳偕弟書綬奉其大父宦蜀事畧眎予因作傳曰方伯公諱積  
生於乾隆甲申年九月二十日越明年公之父峭崖公以選拔  
貢生入京師充景山官學教習凡五稔卒於京邸公之祖西亭  
公聞凶耗慟甚公甫七齡能依、鄰下博重闡歡就塾讀書天  
姿英邁過目成誦暇輒博覽羣籍公母陳太夫人每直雞鳴趣  
之起取晝所讀書使各讀數十過請益不許曰愈讀愈精奚以  
多為年十三補博士弟子員太夫人益令肆力於學曰通經將  
以致用汝父學成而不竟其用齎志以歿汝其承厥志乎公性  
純孝於是研究經史綜核古今得失求為濟世之學兼工詩古

文辭皆秉太夫人義方之訓也庚子西亭公棄養公以承重居  
喪哀毀盡禮癸卯服闋太夫人為婚於陳氏即太夫人之姪也  
己酉公以選拔貢生就職直隸州、判分發四川大府一見賞  
其才數令走邊徼綏輯番夷又從征黔楚苗匪有功奏擢縣令  
乙卯補閬中縣知縣時達州羣盜披猖蹂躪川東數郡縣其燄  
方熾梁山為往來衝要之地丁巳大府檄公往公入境即相度  
形勢以備不虞梁山故有牛頭砦崖壁峻峭中唯一徑可通登  
其巔則林木蒼蒼四望坦然爰為工修治移倉穀備矢礮為防  
守計時鄰水大竹墊江長壽酆都忠州六州縣之民悉東走避  
賊聞梁山有牛頭砦爭趨之一晝夜來者凡二十餘萬人翌日

二矢車  
賊大至見諸砦鄉兵羅布嚴密賊不能攻而公以千餘兵破數萬狂寇三晝夜僅食黃瓜一握事平名由此著張船山太守詩云當時蜀犬正縱橫都怕梁山訓練兵蓋紀實也築砦之利若此雲陽萬縣亦仿而行之自是川東各州郡無不築砦矣次年嘉慶丙辰總督威勤侯勒保公統師入蜀公以砦之足恃也上堅壁清野之議於是有石壩山桃花坪石梯關諸戰公以所部鄉兵前導率獲全勝至望牛埡之役諸將兵同時並潰公以三百人被圍乃募二壯士腰紅旂越賊圍登蝦蟆石斬竹為竿張旂誘敵賊疑為援兵遂缺其北面公得全師以退遣兵赴分水嶺招潰卒復進薄賊再戰再捷轉敗為勝公皆有詩論功擢酉

陽州直隸州知州遷甯遠府知府

賞戴花翎仍留住梁山辦

賊條陳練兵修寨四事大府頒行各州縣以為程式載入石香村居士所輯勸靖教匪編內數年之間遇大敵必身先士卒人咸為公危而公獨毅然任之故威勤侯益倚重公飛章入告仰

荷 天語褒嘉辛酉調夔州府知府是年聞祖母周太夫人訃以承重丁憂賊方走雲陽萬縣境夔州當東川一面大府以巨任屬公乞奔喪不許不得已墨經從戎壬戌擢建昌兵備道仍留攝夔州府事是年冬羣醜以次俘馘川境肅清癸酉三月奉命剿馬邊猺夷擊降之七月之建昌道任復出塞治裏塘土司讐殺之獄事竣乃得奉陳太夫人回籍為周太夫人服喪百



日乙丑奉命返蜀是年冬補川北兵備道丙寅調補清軍鹽茶道丁卯擢四川按察使赴重慶治長壽涪州會匪謀亂之獄戊辰五月馬邊前後營熟夷及峩眉十二地嶺夷勾結涼山生番同時擾邊境公奉命督師以次攻克並剿滅曲、烏生番涼山諸夷悉降己巳擢四川布政使兩署四川總督蜀人咸呼為青天云公以儒生而嫻軍旅所向克捷獲脅從者赦之招集流亡資之還鄉全活無算至於刑名之出入僚屬之舉措平反澄叙罔不允當性戒殺喜施予惡奢華一門少長皆令衣布嘗戒諸公子曰吾家世寒儉爾曹勿忘本也蜀中五方雜處窮民多覓食省垣隆冬號寒於市公見之惻然捐廉俸於城之東北

門外隙地葺屋宇百間俾令棲止人給棉衣歲以千計尤喜節孝事成都有孝女吳七姑者幼喪父守貞至老不嫁以養其母公為旌其門時有賙卹其他有節孝者舉悉稱是曰吾欲因之以勵薄俗也甲戌十月二十九日以疾卒於官卒之日蜀人感沐恩德無不流涕者其明年士民請諸有司為公建祠堂於東郭外歲時享祀勿替道光壬午奉旨入祀鄉賢名宦兩祠丙申若夔入蜀謁公祠公之豐功偉績猶嘖、人口稱道弗衰蜀父老聞公子來相與通殷勤款接無虛日迨同治乙丑有自蜀來者述及祠宇間有傾圮蜀人旋即修治之嗚呼公流澤之長而去思之久於此可見已公子五人若麟雲南鹽提舉署楚雄

二知縣  
府知府次爾騏候選布政司經歷次河清福建莆田場鹽大使  
次四知道光乙酉拔貢壬辰舉人大挑河南知縣次若夔附生  
江蘇候補縣丞別有傳孫七人曾孫五人

家衣江小傳

族兄若夔字衣江行六為方伯公季子幼侍其母陳太夫人由  
蜀南歸僑居金陵孝母恭兄天性醇厚束髮受書即耽吟詠心  
有所得輒自攄寫尤喜博覽載籍凡前人嘉言懿行足為模楷  
者手錄一編積成巨帙年十九補博士弟子員遂專攻制舉  
業秋賦十上皆報罷心厭之乃以書畫自娛動合古法所著詩  
詞名唾餘錄顧以諸兄相繼殂喪為門戶計不得已屈就卑官  
白門聽鼓非兄本志也平素重氣節廣交遊其最稱莫逆者為  
湯雨生都督韓介孫馬鶴船家慎之三先生皆江東名士猶憶  
道光庚戌予將為嶺南之遊先至秦淮度夏時郵政街邸第所



謂抗希堂者本望溪侍郎故居後歸兄家園林池沼擅一時之  
勝予屢過之至是以家中落為他人所有兄則僦居於珠寶廊  
相見握手撫今思昔為之慨然而兄固豪邁了不介意拉余飲  
於妙相庵復至隨園流連竟日賦詩紀事別後三稔而粵寇難  
作金陵不守時予尚在里門兵戈間阻音問隔絕久之聞人言  
兄捐軀抗節苦不得確耗及來揚州晤兄子書紳乃得兄死事  
情狀先是湘漁大兄之子宇正生子鞏甫周歲宇正病歿妻趙  
氏青年矢志撫孤湘漁兄旋卒於京師鞏甫成童兄念其孤露  
無依推友于之愛於公產外析已所自置之田予之戒書紳曰  
吾善待汝姪汝無違汝弟幼稚將來設悔而斂之唯汝是責慎

勿負我初心也且慷慨好施凡友朋稱貸者求無不應癸丑春  
寇氛逼近金陵奉大府檄辦籌防局事兄知事不可為命書紳  
奉母携弟妹避兵江北出借券一一指示曰某為予之至交某  
為予之至戚故當日有無相通數幾及萬今已矣爾曹學做好  
人自有生路若留券為索欠計是使爾曹開爭競之端也是使  
爾曹遂忘先人舊好也倘來物何足掛懷其悉焚之便書紳請  
兄同行兄喟然曰始吾筮仕也將欲圖利祿乎今吾出走也抑  
欲保性命乎吾奉檄籌防義不可去死生有命吾其聽之爾曹  
好自為之母以我為念也家人環泣莫知所為兄力趣之行乃  
媿屬抵通州未及旬日而城陷僕魯元倉皇從賊中遁至通州

言主人於二月十一日在所居蓮花橋後圃遇害事聞 贈鑿  
儀經歷銜世襲雲騎尉襲次完時恩騎尉世襲罔替入祀昭忠  
祠兄配周孺人先卒側室喻氏生子書紳金氏生女一宗氏生  
子書綬邑附生書紳又言金氏庶母獨留侍府君府君抗節時  
庶母仰藥以殉遇救不死得免於難與吾母吾弟之母相依為  
命金氏母獨善持家迄今三母同居雍睦無間言予聞而避之  
附誌於此嗚呼若兄之析產焚券能為人所難為重以見危授  
命大節凜然洵足為吾宗光而媿彼紛、喪師辱國腆顏從賊  
者已

三弟子健家傳

嗚呼吾弟攝篆曲阿歿於王事距今已十有六稔矣迴憶道光  
己亥庚子予與弟偕居京師者二年丙午弟復至京師相聚數  
月迨庚戌之秋予將度嶺道吳中弟留予住寶蘇局風雨聯牀  
者又而月弟送予至松陵驛舟中依、話別賦詩紀事孰意從  
此遂不相見竟成永訣耶嗚呼痛何如也茲者予於肥上建曾  
王父榮祿公家廟弟得祔祀且將重修族譜爰撮舉事狀為之  
傳曰弟名濬泰字子健號東岩嘉慶丙子六月十四日生曾祖  
諱煥妣陳氏祖諱玉達妣宣氏徐氏兩代皆封榮祿大夫妣皆  
一品夫人父諱鍾彥封中憲大夫妣林氏封恭人中憲公為予



之仲父弟同胞三人伯濬履季濬恒濬履為予之弟故弟行三  
弟五歲時仲母林太恭人教識字穎慧異常兒六歲入塾讀書  
一日予與弟自塾中歸省大父指盆中菊命予二人對予曰嶺  
上梅弟則曰瓦上松大父皆頷之既而曰松固有貞操但不宜  
於瓦上耳言次色為不懌予聞之凜然垂老弗忘斯語也年十  
三學為制藝詩賦斐然可觀仲父以其齒稚不許應試至十八  
歲始出應縣試輒冠一軍十九歲補博士弟子員先大夫於諸  
子姪中獨愛弟謂將來必能光大門閭遂商之仲父命偕予北  
上應京兆試計自己未迄丙午南北秋闈凡七試皆報罷不得  
已援例為府經歷弟之初願願若是耶庚申需次吳中直大水

奉檄踏勘蘇松一帶災區請賑許之委辦崑新等邑賑務栖止  
水中者月餘核實勾稽胥吏不敢浮冒終其事全活無算江南  
漕賦甲天下縣令初之任必舉吏以充漕總非黠猾者弗能辦  
也而官有匱乏那移悉取資於吏一旦開徵權在吏手挾制欺  
蒙弊端百出勢不至於虧空不止及至敗露又復行賄營脫比  
比皆然絕無顧忌某縣令交代虧空過巨太守檄弟往拘漕總  
密偵其人潛匿省垣即捕以獻太守喜曰非子之廉烏能罪人  
斯得耶由是大府皆知其才咸豐辛亥權常熟縣事壬子復權  
昭文縣事所至興教化弭盜賊懲健訟贍孤貧罔不區畫盡善  
為持久計不存五日京兆之心常昭故同城去昭文且兩邑之

民焚香拜送於道左者蓋三十餘里云癸丑仲秋賊陷上海賊酋劉麗川潘小鏡踞城中川沙南滙青浦嘉定寶山五廳縣同時應之吳中大震江蘇巡撫吉爾杭阿公奉 天子命督師剿賊檄弟總理軍儲支應弟固辭請以某代大帥俯如所請仍命弟司營務兼筦支應在營十有八月任勞任怨我軍逼賊壘賊已不支會除夕有川勇與外洋人構釁外洋人遂通賊嗾之夜犯我軍諸營弁倉卒遁走弟獨侍大帥集兵固守召外洋人折之以理賊聞風而竄事平叙功晉秩六品 賞戴藍翎丙辰補松江府經歷經歷本閒曹弟則留心民事有闕利害者悉以陳諸長官松屬丁漕尤重歷任縣令交代鞫轄不清弟立為之了

結十餘案故薛君煥袁君芳瑛兩太守先後咸倚重之無何粵賊陷金陵吾邑逼近賊氛土匪蠱起仲父家居團練保衛者凡四年至丙辰冬率嫜屬數十人渡江就養於松丁巳擒匪張落刑遂破我爐橋鎮一時族鄰被難遠來相依者絡繹不絕於道弟竭力措拄多方稱貸俾各得其所戊午冬權丹陽縣事下車之始訪民間疾苦及事之利弊書置案頭思以次第行之本年上下忙糧課前任已全徵解冬漕難以議減弟巡視阡陌知為歉歲戶鮮蓋藏因請於大府減緩冬漕再請再駁毅然爭之益力大府卒從之民以無苦丹陽居運河之衝歲出庫帑修治自漕歸海運工費久停河日以淤行旅農田交病之弟倡捐廉奉



勾工浚河親督畚揭故已未夏秋雖大旱不為災兼葺書院等膏火廣賓興之費是科鄉試登賢書者五人其他除巨盜釐積案諸德政不可勝紀閭閻受福頌聲翕然庚申二月賊首李受成擾杭州大帥調兵往援昏夜大雨抵丹陽百姓惶恐弟冒雨而出曉諭居民軍得宿食行不愆期三月金陵大營兵潰賊陷句容溧陽旋攻金壇弟先期召募鄉兵為守禦計賊至見有備乃退閏三月大帥招潰卒駐軍丹陽索芻芟驅丁役譁噪不已弟部署周至罕以累民未幾賊以數十萬衆來犯總統張忠武公率師鏖戰墜馬傷臂卧病城中相持不下二十八日午後賊復麇集忠武力疾據鞍語弟曰君所募勇多敢死士當為吾一

臂之助弟遂登陴誓衆衆皆感泣乃城外諸營紛、鳥獸散賊薄城下天甫黎明至辰巳之交賊益更迭環攻城中火藥盡猶以壘石下拋斃賊不少忠武出城即為賊所戕逃兵數百入西門賊亦踵至而城中之兵則由東門出走弟率鄉兵數百人巷戰折傷大半賊圍數重奮臂一呼賊皆辟易卒以勢窮力竭遇害得年四十有五時則閏三月二十九日也幕賓程光淮陳澍僕陳升余福桂升及僕婦王陳氏皆死之兩淮運司喬公松年以事上聞贈鑾儀衛經歷予雲騎尉世職襲次完時恩騎尉世襲罔替嗣經署總督肅毅伯李公鴻章署巡撫郭公柏蔭據丹陽紳民呈請於死事地方建立專祠專疏入告得旨俞允

弟配孫宜人後弟卒生子二臻朗臻穀妾王氏守節撫孤生子  
臻騫孫男六人燕序燕桂燕昌燕樂燕林燕榮嗚呼吾弟性情  
伉爽與人交推心置腹失之太厚所求無不應者子祥二弟與  
予同庚生弟則僅小子一歲予三人者少時同塾讀書友于最  
篤忽、數十年間吾父吾母相繼見背近則吾仲父仲母亦不  
幸棄養予與子祥並頽然成老翁已每念吾弟以身殉國未竟  
所施輒復悲從中來於邑累日吾烏能已於言哉姪臻穀告予  
曰當城未陷時長兄臻朗需次浙江吾母及庶母挈三弟臻騫  
侍大父大母寓松郡獨臻穀在左右吾父已有死志揮令臻穀  
速去代奉重闈移孝作忠臻穀不敢留也嗟、聞臻穀之言益

增予痛而弟之追隨忠武捐軀抗節實足以光家乘而詔我後  
人也



周孝婦傳

孝婦姓汪氏淮上舊族其父文成質諒有勇力與周孝廉贈朝議大夫世鈺比屋而居交莫逆孝婦為女時性溫淑喜讀書孝廉至文成家偶見之謂有大家風範遂為其子訂婚焉年十七歸贈朝議大夫嘉益事翁姑以孝聞周氏貧無負郭田孝廉以嘉慶庚午舉於鄉公車三上皆稱貸而出子嘉益則筆耕以償所負家計彌拮据而甘旨之奉復賴孝婦以鍼黹覓蠅頭利佐之道光丙戌孝廉卒有疾醫云不治孝婦焚香告天割臂肉置藥鐺中手奉以進疾頓瘳是秋嘉益亦病孝婦復割肉療之又數年孝廉之妻趙恭人病瘍久不瘳孝婦以夫赴浙中獨侍疾

憂益甚乃復於昏夜潛割肉納藥中於是臂上創累然而三矣  
旁觀卒未聞呻吟聲創痕且速合時為之語曰庸醫視病但首  
鼠周家孝婦三割股趙恭人素勤儉而性嚴毅孝婦竭力侍奉  
幼患痘殘其右臂且體弱多病趙恭人謂貧家須健婦持門戶  
今久病奈何其外母陳孺人夙愛孝婦為延醫治之得瘥有微  
以姑語告孝婦者曰死生命也姑言吾敢懟乎聞者太息去無  
何嘉益以場屋事論成浙江將就道謂孝婦曰吾以老母累子  
矣孝婦泣而言曰君母慮養母教子當力任之君遠行宜善自  
愛是時趙恭人春秋高矣孝婦生一女四子均幼稚所居屋十  
數楹僅庇風雨錢數百緡權其息以資薪水孝婦念千鈞之任

荷於一肩稍不節何以免吾夫內顧憂乃稱食而衣數米而炊  
然堂上之供則逾修潔孝婦前割股療姑、後知之遂善視婦  
至是孝婦病姑亦禱於神曰子遠行婦事我無異於子惟神佑  
之說者謂積誠所感固如是耶又數歲趙恭人卒孝婦黽勉營葬  
事嘉益在浙聞赴慟不欲生竟以毀卒孝婦以家運方否力行  
善事且戒殺病益甚有勸肉食者力卻之朝夕諷梵夾屢感異  
兆箸雲龕紀夢錄平日敬老卹貧急人之難教諸子以先正格  
言忠孝大義諸子皆成立入仕有聲日新春暄官縣今日嚴官  
巡檢日裏則以從九品殉廬州之難卹雲騎尉世職孝婦以子  
貴封恭人全恭教諭陳伊鼎與春暄同官知孝婦為翁姑泉夫病



封股事上其狀於安徽學使景公其濬學使之封翁故與孝廉  
為同年生亦素稔婦之孝行因白諸安徽巡撫英公翰公偕兩  
江總督曾文正公入告 下禮部旌表如例孝婦年七十有二  
同治十一年九月二十一日病革夢有人持紅牋來迓書接引  
字醒而告家人曰吾將逝矣二十四日遂卒春暄時官吾皖倩  
其友持狀來眎予予唯孝婦貧家女乃能讀書明大義孝敬尊  
章刲臂療疾並及其夫一而再：而三人情所萬不能堪者而  
孝婦則毀厥支體成此奇行宜乎聖臣入告名動 兩宮既食  
報於生前復榮施於子姓部臣曰其事雖愚其情可閔嗚呼其  
愚固不可及也若孝婦者足以為天下風予故樂為之傳云

吳烈婦傳

烈婦姓徐氏河南鹿邑縣人候選同知鴻翮之女幼失所恃事  
父與繼母以孝聞同治七年適固始今江蘇巡撫吳公之長子  
戶部主事琳時祖母在堂婦愉聲怡色得重闡歡事舅姑一如  
其事父母克盡婦道於諸姑娣姒雍睦無間言家庭內外咸以  
賢淑稱之戶部幼聰慧能世其家學年十七補博士弟子員益  
下帷攻苦寒暑罔間兩應京兆試輒報罷遂援例入農曹長官  
皆才之無何以幼學得咯血疾巡撫公方以翰林學士擢湖南  
布政使召戶部來湘中仍力疾讀書矻矻不少休同治十一年  
夏戶部病日篤婦侍夫疾衣不解帶者數月每夕禱天乞以身

代延至十一月二十七日病竟不起婦一慟而絕久始甦遂不食其姑強之食乃日進醃半甌嗣一再飲醃皆救而得生朝夕趨侍祖姑舅姑所定省如平時婦先生一子旋殤戶部卒之次年三月請於舅姑曰夫無子誰為視寔安婦願扶夫匱歸葬舅姑憐而許之登舟後痛絕復蘇家人送行者勸慰之答曰吾迨迨數千里奔馳而歸吾以盡吾志耳儻不復見舅姑吾死且不瞑目也從行者莫識其意迨舍舟登陸行至楚豫分界之虎頭關知離鄉不遠即減飲食為必死計形銷骨立神色弗為之變四月初八日抵家乃曰夫匱已歸吾願畢矣由是水漿不入口親族婦女環集方多開導之百折不回其父來視毅然以殉夫

對絕粒十有一日彌留之際告家人曰前此不死於湖南者懼傷舅姑祖姑心也故濡忍至今夫匱葬有日矣得以相從於地下庶幾心安而理順也聞者莫不哀之卒於同治十二年四月十九日年甫二十有七湖南巡撫王公文韶以其事聞於朝得旌如例吳氏為中州右族巡撫公之伯兄吉齋先生為濬頤姑丈戶部之群從則皆濬頤之中表弟兄也去冬姑丈挈幼文松友兩表弟過邗上談烈婦殉夫事甚悉今年二月濬頤往吳門謁巡撫公復示以王侍郎疏屬為作傳濬頤竊思烈婦之奇節苦行實為人所難能當夫死之日已判一死而不忍使祖姑舅姑見之乃遂巡就道歸里之後始以身殉夫踐同穴之盟嗚



呼其用心抑何委曲周至若是耶既孝且烈方之斷髮截耳殆  
有過焉斯固可以不朽已

色烈婦傳

天下之不畏一死以全名節者在忠臣義士視死如歸固已難  
之矧其為婦人女子哉婦人女子而出於貧賤者之家非有父  
母之教詩禮之訓而貞介自守不為利誘剛斷勇決過於丈夫  
則尤難已朱生銘盤告予曰烈婦某佚其姓丹徒人適色氏子  
其姑在堂夫無行好狹斜游遂亡去粵寇之亂婦奉姑奔泰興  
貧不能供菽水傭以為養會其女妹繼至家甚裕迺婦之姑同  
居有張十一者艷婦色傭而厚其貲屢挑不從因而謠詠之姑  
與女妹俱信其言疑婦、無以自明遂溺水死取其尸寔之免  
如生衣裳皆紉方子曰烈哉色婦以貧不得旌予懼其久而湮

沒也為著於篇以告采風者

秦興三高士傳

一鄉一邑之間抱奇負異才力過人者顧窮而在下終其身不聞於世如朱生銘盤所述秦興三高士有足多焉曰何萱字石閭善治經通訓詁聲韻之學著紅露館文集三十卷韻史百卷性節儉冬一裘夏一葛中夜危坐著書沈思渺慮口角流涎則盡血也家人自窓外窺之有紅光如火滿室當時名宿如李申耆龔定菴皆與之友曰陳潮字東之通經工小篆當時謂其質樸古尺上埒陽冰又擅周髀之學夜登高臺仰窺星象達旦不寐酒酣耳熱慷慨談天下事十中八九遊京師輦下諸巨公咸引重之年才三十九卒於客邸與龔定菴友善人目為陳龔云



日潘人麟字散木少恃才放佚鄉里恠之長好詞章所為駢體  
文瑰麗無匹善繞弋故實典雅淵博有敏之者輒媿、答不休  
國朝朱竹垞毛西河所著詩文皆能摘其使事之謬舛蓋百無  
一完者晚益窮困縱酒耆博放浪規矩之外一日忽治具集朋  
儕涕泣為別衆詫之答曰世上鬱、吾將從河伯逝也翌日投  
揚子江死舊史氏曰石間散木之詩文東之、小篆吾皆不得  
見而第聞朱生道其人且屢、言之朱生年少嚮學工詩文善  
篆隸亦近今之佼、者茲所稱說殆不虛也竊願其努力前修  
和聲鳴盛而勿與三高士相伯仲也

徐剛毅公傳

咸豐四年濬頤家居時金陵為粵寇所踞吾鄉土匪蠱起道塗  
梗塞先叔父鐵君公率濬頤上書於袁端敏公端敏檄剛毅督  
師至北爐橋剿賊自五月至七月燬陸家橋孫家集姜家岡廟  
岡集蘆塘寺王家岡杜家岡郭家莊土山岡賊穴無算又有朱  
家岡馬家岡之捷而俞家圩賊相持最久則合圍以斷外援掘  
地以洩濠水復用火箭焚其積儲所謂偽帥主軍師上將之屬  
皆殲焉濬頤與剛毅公數相見深服其勇敢明決有大將才乃  
未幾移師臨淮自是遂不通問迨同治三年公以汀漳龍兵備  
道捐軀殉節濬頤遠在嶺南又不獲一伸哀挽之私而公之大

有造於桑梓固至今永矢弗諼也謹據喬公松年所撰行狀而為之傳曰公姓徐氏諱旭字曉峯以字行又字雲溪先世居崑山元季遷泰州後分縣隸東臺為東臺縣人曾祖幹祖同初父介賢三世皆贈資政大夫如公官母皆夫人其十世祖燭、弟耀為明都察院左副都御史以直諫稱祀鄉賢族裔守其教公父贈公年四十始娶于太夫人初無子子兄子肇源晚乃生公公生有異稟方嬉戲則部勒羣兒如軍陣然見事敢為無所怖贈公衰病太夫人教公嚴篝燈課讀倦寐必涕而命杖既長撫其癥輒嗚咽公年十五太夫人歿十六贈公歿、無所依顧獨者學從兄鏞嘗以元日見公方讀書心重之延歸課其子居

無何謝去雨雪閉逆旅十日讀杜詩有所悟從此思如泉湧屬文立就遂遊通州登狼山賦詩州之知名士爭相結遊拊茶拊茶王母今 貶封太夫人者決公當貴以女妻公贅焉數年生一子一女公有抱負居常鬱鬱欲一遊京師王太夫人為辦裝附番舶泛海將近高麗病垂死既至春明僦僧寺以岐黃丹青餉其口有贈公三百金者俾居積食其贏不責償也既乃為掌者篋去公售物質衣足之以還贈者曰僕不嫻此毋徒負公也都人以此重之時湯文端公方在告聘主敦仁堂事敦仁堂者京師施振窮乏諸善舉歲出入鉅萬初公遊既困歲除獨步出彰義門見厝棺象積皆南人不得歸骨者因自傷私祝曰曉峯



即有力當盡瘁此既主堂事如其言咸豐初考取供事官直  
上諭處公無徵遂交獨與朱主事麟祺袁編修保恆友善知天  
下且多事相勵為有用之學公尤究心孫吳從異人受刀技甚  
精三年工部侍郎呂文節公奉命辦理團練督剿擒匪求得  
文武材與俱公從之時民團未集軍府草創賊數千踞蒙城文  
節與公步卒二百令往攻公晝張旂秫田中夜卷甲進聲言大  
軍且至賊棄城走追一日夜乃返蒙城復以功給六品頂戴袁  
端敏公以兵科給事中莅皖軍檄公充統帶官漢回構釁煽穎  
上公捕殺馬文俊史善孜等穎上平九月賊有鄧大王者合五  
十八擒抗官軍戰於高公廟大創恚復糾三十五擒、百人方

夜瀝血會飲於標里鋪掩擊覆之十月剿雉河集一戰八里莊  
再戰臨湖集又戰馬家柳林奉旨以縣丞留安徽補用賞戴  
藍翎十二月剿蒙亳誘擒劉宏烈武大僧潰其衆縛而磔之大  
僧者偽四大天王之一既就戮民間相慶又戰楊家塘鐵李營  
凡八捷四年正月再剿雉河薄壘、空搜伏至成福寺與遇力  
戰擠之渦上暮收兵遲明畏瘡督戰益厲賊崩潰進次蒙城遂  
攝縣事撫傷殘輯流亾人感其德時群擒方熄粵賊踞高唐金  
陵賊分股北援三月公從端敏公追及於蕭縣之郝家集賊渡  
黃半渡擊之截其半南走犯潁州駐回溜集過沙河賊下竄正  
陽擒賊乘機復起臨湖集者擒之分窟與雉河義門為犄角前

二知縣  
距湖中通一道公伏火器道側輕兵繞湖譟之賊不敢前出二  
千人陣集後乘風縱擊公佯遁抄上風敗之義門賊護巢不出  
端敏誘致之公邀擊於馬家樓賊陳衰十里火器接更擊更伏  
相持久公麾軍蛇行擊且進賊中卻為偃月勢分軍角之奔斃  
偽順天王張捷三殲其黨千五百人三集皆平奉 旨以知縣  
補用加知州銜俞家圩之役復奉 旨賞換花翎金陵賊跳滁  
和間圖北竄端敏檄公南顧駐烏衣鎮賊五寨溝隧環絡公微  
服探其徑會諸軍於烏江為右翼居先因西北風揚沙以進道  
項王廟道隘填以扉賊颯風出抗火器輒自焚益縱火寔烟擣  
其寨賊亂奪津擠入江覆舟死者甚衆偽天官丞相秦日昌連

舸來救師又燔奉 旨以直隸州知州補用五年隸提督向忠  
武公營石磧橋會水軍攻四五六壩皆拔進營香泉香泉去賊  
邇廬鳳道張光第檄公援全椒公以兵單不能分顧辭不聽乃  
抽隊之大半馳抵全椒圍解賊果乘虛急攻營馳回營已不守  
竟坐擅離營有 旨褫職六年安徽巡撫福濟公江南提督和  
春公以公剿擒賊有聲檄回守宿州懷遠救潁上賊攻皆不下  
以完三城功奉 旨服原官六月端敏再出視師檄公守潁州  
賊去留督潁州民團公以偏師出入江皖豫三省二百餘戰皆  
先士卒冒險阻為諸將倡頗用權數動合古兵法未嘗大衄端  
敏尤倚賴之嘗單騎野行遇伏矛及左腋傷頤又刺著鞞不得



拔乃免礮洞馬腹馬倒傷頸背易馬復戰掠陣鎗中冠頂與客坐語帳中客舉手飛礮墮其腕公卒不動是年始卸統帶事充營務翼長竭心贊方畧諸將莫能與後河南巡撫英桂公都統勝保公並奏公掌營務皆未久卒從端敏相終始七年三月隨剿宋亳宋亳間有圩十二營錯之語聲相聞戰三旬王圩拔奉旨以知府歸候補班用旋拔鄧圩姚圩及小圩九宋亳平時都統督皖軍端敏副之八年春合軍圍六安公駐八里塚為後應四月賊渠張落刑龔得澍悉眾圍出大軍失利賊夾淠水陸並下公收殘卒成三營設伏葦間伺賊列燧星馳伏起三營共蹙之賊轉潰公聯筏西渡迤北至菱角嘴始與兩帥會奉

旨記名軍機處以道員簡放旋剿宿州賊陸連科有陳圩年圩洪溝郟溝草溝之捷九年正月奉旨加鹽運使銜落刑既

踞鳳陽府縣張元澄踞臨淮跨淮連柵岬負甚雄公創大艦人隱購艦中奪關大捷臨淮復元澄奔鳳陽十年正月進圍鳳陽元澄乞降然猶豫公為總兵張得勝書招之詣帳口對狀至數而戮之民爭齎割食之盡鳳陽縣復落刑亦棄府城走奉旨以各省道員簡放加按察使銜初落刑起甚微公從端敏戰降之役部下端敏中去乃復肆卒為劇寇苗沛霖用圩練起積官川北道與攻鳳陽驕桀萌異志公恒以大義責之故沛霖尤忌公會金陵圍潰常蘇相繼陷捻躡青阜天六賊集艘於湖江北

門戶洞闢人心岌、端敏慮捨粵勢合更大壞奏公回籍督裏  
下河十六縣團防事公受命馳傳築圩山清高竇間城恃以  
固叛將薛成良踞湖窺泰州公手書致款曲陰趣水師總兵黃  
開榜擣平之湖防肅遂舉江防時江南皆賊地北人無敢渡者  
公以南港少於北易拒且毋令賊出江奪天險也親履江陰武  
陽相度下木石留髮之民感激願為暗團撫盜艘八哨隸水軍  
而游奕水軍六總兵得以列汛駐江上造長龍跨海船築長堤  
起江都迤東訖通州令民團勢相接賊終不能北渡江北州縣  
獲力田服賈歲供軍食公始蒞之力為多自公出居京師五年  
轉戰四年筦營務又四年中間一至家厓留三日至是方里居

倡修耕耜公隄葺海安宗祠鄉賢祠設敦誼堂贍貧族故舊  
皆厚遇之巡屬邑有司供張悉却之手治官書恒徹夜不寐事  
苟闕利病雖非所職必寓書當道反覆指陳為民請命鄉人咸  
悅服之十一月簡授福建汀漳龍兵備道端敏奏留公督淮  
南鹽釐鹽課事未竟闕之大府奏趣之同治元年秋航海之閩  
朝廷以江防靜謐追錄前勲加公二品頂戴十二月履任即  
劾知縣不職者降典史捕海盜偽國公陳追散其黨都司辛敦  
仁為漳大猾掠人妾匿山中官吏莫敢問公廉得以計收之瘦  
死漳人稱快二年四月潮嘉賊李阿四闖入汀龍肆焚掠公督  
剿遁去踰境購獲寘諸法建昭忠祠節孝祠丹霞書院虎渡橋



皆捐廉以倡自為文記之士民翕然稱頌三月署按察使粵賊  
大股經贛趨閩中大震巡撫徐清惠公奏公督辦全省軍務  
諸軍咸受節制四月統師駐延平汀洲兩鎮不用命効之  
敗賊於杉關扼險以守賊逡巡轉入粵撤防以七月三十日卸  
按察使事八月二十日復漳任漳粵間壤錯徑雜賊蹤出没訛  
言日至當事多恃嶺不為備公甫受事勢不迫九月初九日永  
定陷亟遣吏至平和南靖糾民團募勇詔安日夜治文書告急  
徵兵餉將出駐適中之地為規復計十一日武平復陷按察使  
張運蘭死之賊盡掠諸謀警報不至十三日集同城官議城守  
初漳俗好鬥單戶無以自存則彘緣充鎮兵雄其里實不支餉

不應調公稔知之練勇四百備不虞後為攝事者剽土匪殲焉  
至是調兵僅二百屬游擊沙肇脩與守令分門守勇五十屬守  
脩徐墀外委時金彪為親隊夜遣南靖縣陳能超進扼林天關  
十四日晨起有擔夫數十叩西城守者以告公曰賊也命金彪  
往禦自率僮隸繼出至天后宮果遇賊金彪方喋血塵拒公麾  
眾殊死戰市人升屋投瓦逐之交衢賊四合礮中公腹猶倚墻  
手及賊久之擁去偽侍王李侍賢踞鎮署以偽封脅公：瞑目  
曰任爾寸裂吾尸毋傷百姓一人也不食錮空室中佯以鳩進  
實人獲公叱而傾諸地書壁曰壯志未酬君恩何補取義成  
仁臣心千古賊知不可奪更以火灼手指至焦墮罵不絕口十

二矢車  
七夜遇害王夫人方病卧以城陷之頃扶女文姑及陳媪出署  
後叢祠為繯授女絞之斃乃自結帶與媪共經於樹羅仁皎掾  
也挾公子銘勲易服走竟相失明年城復公甥縣丞吳錦江以  
夫人文姑陳媪之骨歸海安公骨賞購無知者有義士私弃一  
節燬斷不能辨乃以衣冠葬別瘞骨於隴外銘勲之聘妻王氏  
奔舅姑喪成服受弔焉公歿年四十有五夫人歿年四十文姑  
年二十未字浙閩總督左公宗崇福建巡撫徐清惠公御史汪  
朝榮先後以聞天子屢詔嘉獎有忠孝節烈萃於一門之  
諭 贈內閣學士銜以二品例 贈卹建祠 賜祭葬謚剛  
毅國史立傳妻王氏女文姑並旌卹如例

方濬頤曰喬公松年任轉運使僑治泰州適公歸里辦團防喬  
公與公共事甚相得時苗沛霖猶未叛寡識者皆為延譽公與  
喬公獨言其詐也公以戰功著而書畫詩皆工妙書奇逸詩悲  
壯畫尤清婉可愛亦喬公言之喬公又曰咸豐三年閩中刀匪  
陷漳州兵備道文旦公死甚烈賊不旋踵而滅漳人謂文旦公  
之神實殪之後十一年復見公死難甚烈賊亦即盡殄漳人謂  
公亦陰誅賊如文旦公云公攻克俞家圩後僮再駐師數月搜  
捕餘孽則吾鄉永無後患而惜乎端敏方有規復舒桐之舉勿  
暇魚顧予與鄉人往臨淮乞留師端敏則檄張小浦方伯一軍  
暫駐爐橋數月頗有斬擒未幾予北上小浦亦返臨淮端敏遭



二矢車真  
謠詠名還京師而吾鄉遂不可問矣小浦近僑居邗上每與之  
追談往事不禁仰天太息也

歸安孫氏兩世節烈傳

歸安有賢母曰吳孺人其大父掄元 御前侍衛南贛鎮總兵  
父治邑諸生適同里文學孫君錦里其子婦亦吳氏歲貢生鈞  
之孫諸生駿之子茂才模之妻先是文學在時終年遠游孺人  
奉尊章持門戶有聲三鄰間文學歿孺人益黽勉勿懈有丈夫  
子三人長某蚤卒次楷次即模以次成立顧家世儒素孺人謂  
宜以力食命楷挈其婦佐幕銅山盖楷未有子也又命模挈其  
子游滬瀆而獨與模之婦留治家事粵賊陷歸安模婦抱幼女  
與婢秀霞左右掖孺人出走過賊仆於地婦遽起憤罵奪路賊  
以刃斫之血淋漓衣裾間且罵且走覓其姑少選則傳聞赴

水死矣婦號哭覓姑不得則抱其女躍入水從之秀霞牽挽其裾亦痛哭隨入於水時則咸豐十一年五月二十六日也孺人年八十婦年三十有一婢年十有三舊史氏曰予聞諸董策三屬為紀之彼紛、畏死貪生者玷辱衣冠為世唾罵抑何其不女子若耶孺人以八十衰年視死如歸固為人所難能而其婦其婢之毅然決然相隨抗節又未嘗少遼緩也嗚呼烈已

金烈婦傳

烈婦姓金氏象山人年十七歸慈谿金某且三年矣金故業漁傭海上恒數月不歸姑龔不安於室故與湯某私湯窺烈婦艷其色謀諸龔許之以賂龔貪其利又懼失湯歡誘婦、不從固強之斷一指以示決龔憤撻之終不屈乃掘地為窖驅婦赤身跣足處其中實以瓦礫覆以木僅露其首以銀鐺繫頸傍列敗甑使一手可掬食者已乃烙鐵令赤日夕焯之自五月以至八月縻有完膚婦竟不從八月十四日龔謀以沸湯沃殺婦適有鄰媪來知其謀為哀免之天儻晝晦雷聲旬旬震屋龔大慙乃止異日媪以告其鄰、人固疑之聞媪言益信集眾闕以入出



婦於害則蟲集於身奄然殆矣尚能言乃浴而衣之舛而鳴諸  
官逾時烈婦死觀者咸羅拜泣下邑宰視其尸則遍體焦灼如  
炭遂逮龔及湯寘之法贊曰婦何烈姑何惡匪姥知官奚覺漁  
者弗歸致有此虐著之簡編可駭可愕

謝令君傳

粵賊之難無有以知縣擊賊而能勝賊者有之南則六合縣溫  
北屏紹原北則天津縣謝雲舫子澄也溫君屢勝賊守七年而  
身與城俱亡謝君一再勝賊身死而城以全其遭際又異焉謝  
君四川人宰天津以清廉稱寇至謀所以守顧兵不足恃則募  
郊外射生手數百人厚其廩為禦侮計其人素矯捷習火器弋  
飛鳥鮮不中者入陣則一轟百應機若連珠絕無虛發然而倉  
卒之際不能得將材獄故有囚曰劉魁元者以伸不平事被繫  
君入獄相之大喜曰壯士也飲以卮酒告之曰汝罪且死盍歸  
糾同志殺賊免死且可立功魁元泣謝出獄部署定與君約期

夾擊君先以兵合殺十餘人賊遂至殊死戰度賊已疲魁元軍  
蹶起蘆中截賊陣為二首尾弗相顧賊惶懼大呼馳之斬馘無  
算城圍立解大府奇其功命君統師往追賊、伏土壘不敢出  
會佗賊以援師至君敗之遂入壘共死守於是某大帥軍其東  
君軍其南魁元率練勇馬成龍等軍其西北賊出驍騎數人犯  
我軍君力禽之未幾賊紛、出壘君知其將為萬死不顧之策  
奮勇衝突以僥倖一生因激厲士卒直前搏擊而賊悍且衆君  
中礮墮馬魁元成龍拔君行傷重同躍入水死然自是賊不敢  
復犯天津事聞 賜布政使銜君囊無餘錢天津之民痛喪弗  
得歸也咸挈賻投殯所不署名逕去既又建祠奉粟主歲時祭

禱勿絕云方濬頤曰謝令君死難天津時予方在里門及入京  
師道馮官屯則見僧邱浚河作長圍壁壘森嚴軍令甚肅行旅  
無恐抵京師不踰月我軍破馮官屯縛賊首檻送京師梟於市  
而天津軍事終不得其詳也今獲董子策三所紀事畧爰為之  
傳或曰某大帥忌令君勿援故使陷於賊此一說也吾竊疑之



石烈婦傳

烈婦許氏泗州人祖某蒙城訓導父某邑廩生婦幼讀書知大義年二十一適汴涯石振舉振舉尋卒有子二撫之成立擒匪擾泗且及汴涯地濱於淮故多舟楫村人聞警皆以船為家出勇丁聯隊伍防賊所謂船練也賊踞西岸諸練丁從佗道擊賊未返老弱倉卒見賊解維思遁百舟互相舂撞直東風正競婦舟隨波而西度終不可免則擠二子於水遇佗舟援救婦顧二子得生則再拜辭其姑躍入水死之其娣王氏同赴水死并其子女皆死時咸豐辛酉十二月二十四日也董策三為予言之鑿、東南寇亂草野細民抗節以死者得旌於朝固可無憾

然而窮鄉僻壤官府罕有見聞貧家末由舉報其湮沒而不彰者蓋不知凡幾矣故予每遇友人談忠烈事必書一通以備采擇發潛闡幽名教中人皆當引為己任夫豈論乎地位也哉

關忠節公傳

公姓關諱天培字仲因號滋圃江蘇淮安府山陽縣人曾祖宏睿祖恕父自明皆以公貴贈振威將軍廣東水師提督公以嘉慶癸亥由行伍入邑庠試用淮安把總陞揚州營守備以歷獲匪犯功題授川沙營參將督海運有功擢蘇松鎮總兵道光癸巳奉 旨入覲 召見五次溫語慰勞交軍機處記名甲午九月兩廣總督盧坤等奏嘆咭喇國哱嘑來粵貿易兵船不遵法度闖入內河 上以水師提督李增階疏防褫其職 命公代之 詔曰廣東風氣浮而不實加以歷任廢弛水師尤甚朕以爾有幹濟才特加擢用爾須激發天良公勤奮勉實力操防



務期海疆靜謐勉哉毋忽公聞命愧勵令妻子奉母還里隻  
身挈三僕間關入粵至則親涉重洋審形勢以虎門為最而於  
沙角大角立兩礮臺為第一重門戶復於南山鎮遠橫檔立三  
礮臺為第二重門戶而大虎礮臺為第三重門戶以舊礮臺甃  
石受礮易摧毀乃益大其臺以沙土代之得以柔克剛之義又  
慮夷船堅厚兩旁皆支挂檔礮不能傷乃於南山鎮遠中山根  
兩岸礁口鑿石為樁兩岸繫鐵練凡八練徑四十丈施於木筏  
之上開合自如鎮遠橫檔北亦如之又於蘆灣金洲諸山下水  
淺處樹木柵繚曲縈紆使番舶不能徑行礮得轟擊規制甫定  
而禁烟事起矣制府林文忠公截回躉船二十二隻焚鴉片烟

土二萬二百八十三箱有旨褒公賞給法福靈阿巴圖魯勇  
號夷人失巨利奸商煽之夷人乃據浙江定海縣以怵我而赴  
天津訴於直隸總督乞和有相國若越廣東即可永遠和好之  
語於是文忠謹成署粵督某公來一意主撫撤防戍以副將某  
開礮致敵怒令自任咎諸要隘請兵者僅予二三百人然猶以  
夜渡不敢使敵見公方守虎門亦止羸卒二百沙角大角相繼  
陷威遠靖遠諸臺皆將不支勢岌、公自詣制府痛哭請兵固  
不予且命毀排練速成和議公知事不可為返礮臺晝夜督戰  
創痕徧體事急以印付僕孫立使去僕不忍公以刃逐之曰吾  
不能報天恩下不能養老母死有餘恨汝歸告吾妻子但能

孝吾親吾目瞑矣僕走至山半而公為飛礮所中遂薨時則辛  
丑二月六日也僕以印送撫軍復返求公尸以歸同官醵金以  
斂事聞上震悼賜卹如例予世職建專祠尋賜謚忠  
節入祀昭忠祠命翰林院撰墓碑并為文以祭其後公辦洋務  
而志與公同者有裕靖節公辛未奏疏云故員闕天培征調不  
能自主無可如何以身殉難其明年備公牘致各疆吏言粵東  
毀防事及公不得已為國捐軀狀尤悉林文忠公挽公云六載  
固金湯問何人忽壞長城孤注空教躬盡瘁雙忠同坎壈聞異  
類亦欽偉節歸魂相送面如生雙忠謂游擊麥廷章與公同日  
被害者也公嘗自言曰星家言漢壽亭侯祿命係四戊午吾日

時皆戊午當生揚威死血食然六十有大難願受國厚恩不  
忍以乞休願以死報國矣死之前數日緘一篋寄家人戒勿啓  
及殯啓之則墮齒數枚敝衣數襲也公性好書史然不習詞章  
奏疏文移必手自削稿所著籌海集四卷言防海事甚詳往來  
公牘條理該洽公生於乾隆庚子十二月十四日卒於道光二  
十一年、六十有二子二長奎龍仕至吳松參將先卒次從龍  
襲職騎都尉改安徽、州府同知孫某恩賞營千總餘某、  
贊曰焚烟之事粵人或毀或譽迄無定論度文忠不謹戍必有  
以善其後夫豈妄為孤注之擲哉濬頤在粵九年每聞粵人談  
忠節虎門死難事罔不歎歎太息以為今無其人而惜乎未得



一登浴日亭以伸仰止之思也既獲公行述讀之略為詮次如左文忠全集尚不及見佗日訪之閩中予雖不文猶欲有所著錄附公以傳於世

師理鄉贈公傳

同治己巳春濬頭度嶺來揚州而是年秋竹庵觀譽亦奉大府檄督辦京江北岸保甲居佛感洲先至邗江一見即相投契敬詢家世乃知先贈公與先叔父悔軒公為嘉慶己卯同榜同年同官內閣竹庵兒時嘗聞贈公呼先叔父之字曰此吾同年好友也竹庵遇事敢言伉爽無城府重以兩世交忘形爾汝尤稱莫逆忽、聚首己七稔已竹庵見濬頭方學為古文一日者持贈公墓誌墓表泉崇陽忠節坊贊見眎乞為贈公作家傳濬頭不敢以謏陋辭謹為傳曰公姓師氏諱長治字泰階號理卿系出太原郡晉公族大夫服之後自明正德間鄉貢士鐸遷陝西

韓城縣井溢村遂家焉祖彥公官江蘇淮徐海道考慕祖官河南  
 上南同知以榮光貴三代皆贈通奉大夫榮先即竹庵觀察也  
 妣康太夫人繼妣高太夫人昆弟三公為中子康太夫人出配  
 何太夫人公嘉慶六年五月十三日生幼而岐嶷每讀書至古  
 人忠孝大節輒慷慨太息者久之性至孝甫八齡失恃哀毀如  
 成人處昆季間極友于之愛弱冠登賢書官內閣中書充  
 牒國史方畧諸館分校克勤厥職道光辛卯出宰浙江上虞有  
 政聲甲午充浙江鄉試同考官得士獨多海塘之役七晝夜均  
 工搶築完竣浙人頌之乙未丁外艱盡哀盡禮服闋辛丑部選  
 湖北崇陽令崇故號難治是年正月上元突有眾數百持械闢

於市毀民居且及縣治令君折某亟出視輒為眾侮要以減收  
 漕額不則將為亂令君計無所施遂揭示通衢始轟然而退公  
 下車後廉得主名罪魁為鍾人桀密白大府請捕治之不報旋  
 屆開徵公聽民完納輸將恐後亂民無隙可乘會逆黨金太和  
 為人所控提省定讞鍾逆詐言禍且不測為報復計糾眾千餘  
 薄城下勢洶、公命榮光齋印請援於鄰封已則登陴督戰而  
 逆黨有僧白清者以邪術致我軍不利逆眾蠶擁而上城遂陷  
 眾猶感公恩不忍加害公瞋目謾罵曰吾守土之官城亡與亡  
 汝輩勿傷百姓逆黨環而守之一晝夜之久公罵愈厲眾為氣  
 奪而人桀驅使汪貴仔操戈直前公竟遇害時則道光二十一



年十二月十三日年甫四十有一計視事僅三月餘耳時何太夫人在揚州令側室吳恭人送公之女姪于歸徐氏徐亦宦楚南故恭人暨女姪皆及於難僕之殉公者曰王淶曹斌崇人戴公德為公殮潛約伺釁圖鍾、逆署偽號並陷通城犯蒲咸二邑明年壬寅我兵雲集崇人縛鍾以獻榮光年未弱冠能作包胥之哭至是隨大軍入城治喪鍾逆檻送京師磔於市汪貴仔遁至臨湘忽返犇獲之盡吐實湖廣總督裕泰公命縛至公靈前剖心以祭事聞奉 旨照陣亡例優卹加知州銜給雲騎尉世職恩騎尉世襲罔替 賜祭奠建坊史館立傳入祀本郡本邑昭忠忠孝等祠崇陽並建專祠以表忠節讀墓誌及坊贊云

汪逆供稱逃至臨湘歛若見公駟從在途攝之返至會鞠時恍惚又覩公危坐堂皇震懼不敢仰視聞者異之嗚呼公捐軀報國靈爽在天固信而有徵也公子一榮光孫男四思源恩祿恩壽恩喜孫女三太夫人茹痛持門戶教子成立初以鹽知事分發兩淮晉秩知縣佐戎幕有功知鎮江府事江蘇記名道兼襲雲騎尉世職 賞戴花翎太夫人先卒於泰州榮光墨經從戎三奉奪情之奏不得歸葬嗣又以城為賊困弗克陳情迨五解城圍出萬死一生之地匍匐扶贈公及太夫人靈櫬冒鋒鏑踰險阻十閱月抵里以同治二年十二月十二日合葬於村南新阡嗚呼贈公之忠觀誓之孝萃於一門洵乎可以不朽已

方濬頤曰竹庵守潤州時距崇陽之變已二十二年自言力捍危城烽烟晝暝飛礮雷轟每念孑然一身終鮮兄弟設有不虞則兩親永無歸葬之期淚涔涔如雨故奉補孝恩旨即乞歸里觸忤上游被劾去官甫得盡為子之道尋以從征秦隴復蒙恩以原官起用予聞之肅然改容既心欽竹庵之善承先志移孝作忠而益見我理卿年丈之所以佑啟後人者為不可及也成仁取義其後必昌竹庵勉之哉

戴都司傳

君姓戴氏名天保字九如江南泰興人幼穎悟讀書日數十百行過目成誦少長喜擊刺之術有勇力其父奇之授以孫子輒伏案呬唔一日忽弃去謂所親曰是規也耳神明在人古人安能桎梏我耶會粵寇起君聞之憤然曰此何時乃牖下居耶由慷慨激昂更與人終日抵掌談兵鄉里咸異之尋應武試舉於鄉隸江蘇巡撫吉爾杭阿公部下每戰揮戈直前多所俘馘撫軍重其才洊擢至都司亡何賊南下一夕合圍當是時撫軍大營在九華山君則屯於金山賊奔金山而專攻九華圍之十數重君從山上望見之大呼亟馳馬率步卒百餘人力突賊圍賊



圍堅不得入君殊死戰自辰至未得入之賊大怒亂矢如雨下君馬不能進遂死之而九華大營盡覆撫軍亦以身殉君平時嘗語人不死君父別無死所嗚呼蓋其志向堅定挾持者有素已事聞 賜卹如例

方濬頤曰朱生與戴九如同鄉里知之最詳為予言之若九如者使為大將必可平賊惜乎其官止偏裨而遽罹於難也于漢卿曰圍九華者為四眼狗陳玉成固悍賊云

溫令君傳

溫紹原字北屏湖北江夏人由鹽運司知事捐升知縣分發江甯咸豐元年代理六合為民所留因署縣事二年冬粵賊陷武昌紹原亟修城垣工甫竣總督陸建瀛已由九江潰還江甯而賊踵至琦文勤公以軍救江甯抵六合聞江甯陷揚州亦相繼陷遂率衆圍揚州拒賊北上而留黑龍江兵二千駐浦口吉林八起馬隊駐六合四月賊以十二軍犯浦口黑龍江兵潰進犯六合紹原督千總徐琳外委達成榮拒之於龍池琳敗沒時天大雨成榮着皮鞞腰刀執環仗往來賊中連殺十數人賊辟易會賊十二軍畢集成榮與其婿李祥和死之紹原聞敗以餘衆

退入城密遣死士縋出賊後夜縱火賊方燬火神廟推其像不  
仆已大驚火起益詫為神大亂紹原率吉林兵自火中突出橫  
擊之賊遂遁紹原請兵於文勤為賊再至計文勤命總兵武慶  
總浦口軍以昨甯人王家幹署城守代徐琳紹原益募勇令千  
總夏定邦駐卸甲店家幹及秦懷揚楊升駐城中武生陸占魁  
鄉董任瞻如阮悅三帶練勇分駐各鄉時六合駐防兵勇合浦  
口官兵得八九千人賊遂不敢正視十月賊犯東溝外委胡某  
死定邦力戰卻之嗣揚州調回吉林軍以都司鄧鳳林督固原  
兵三百來駐冶浦橋分家幹督徐州勇守東城千總徐鎮海守  
南城占魁守西城武舉楊士義督民勇守北城哈連陞東南角

達孝侯東北角皆回勇吉林馬隊及懷揚升瞻如悅三為游兵  
四年復移支應局於城中規模大定與揚州江甯軍聲相應商  
賈輻輳滁全盱泗皆由瓜步渡江上游商賈市米穀者漸至分  
置卡隘按千錢抽釐三分計十七局用益饒二月賊犯浦口武  
慶擊敗之紹原令水勇拏小舟徑入賊寨奪賊船無算賊橫鐵  
鎖三重於白河口北通九洲截艇師不得上駛時艇師吳全  
美以事被議懷觀望紹原詣其舟說之且請於向忠武公以百  
口保全美全美感奮斷鐵鎖三重江路以通五年春賊援鎮江  
聯巨筏為四牌施樓櫓中載糗糧障以牛皮名曰龜船順流東  
下拖魯紅單諸戰船左右夾擊紹原令水勇沿江燒之其竄入



泗源溝者亦為艇師所截紹原乃建議於段腰口橫江設鎖復親詣相度潛至觀音門七里洲時南岸之民已從賊紹原陰撫之南岸民亦陰以賊事輸紹原夏吉林馬隊調往揚州遣前戍六合七八兩起及曹州鎮多隆武勇五百人來戍紹原與多隆武議剏築土城七月立上下兩河釐局令附生陳慶華王鶴齡駐迎秀庵防水道奸宄十月命四鄉整飭團練設火藥局十一月懷揚家幹擊賊於九洲遂破之紹原擢知府賞戴花翎懷揚等陞賞有差是月江蘇巡撫吉爾杭阿調六合勇至鎮江紹原命定邦頭起五百人往二起三起繼之定邦至鎮江擊賊頗有功六年春賊犯浦口總兵武慶敗退走六合浦口陷紹原飛

書請援於忠武忠武遣漳州鎮總兵張國樑率兵四千由石埠橋渡江築五營於龍池賊回攻國樑國樑擊其前紹原率懷揚及千總海從龍邀其後大破賊於毛許墩賊由葛塘遁紹原從國樑連克浦口江浦二城會賊由儀徵入揚州紹原亦退歸浦口因請益兵於忠武忠武派副都統明安泰督兵二千駐冶浦橋儀徵復撤回紹原又請於吉爾杭阿將三起練勇撤回軍乃振五月吉爾杭阿兵敗於九華山死之江甯府知府劉存厚從死於是紹原為江甯府知府留駐六合以李守誠補六合令七月大營兵潰忠武退丹陽江北大旱土匪蠡起於天長之三龍岡紹原馳往斬一人亂乃定八月土匪又起來安紹原率懷揚

家幹大戰於施官集賊退保鼓山紹原移書來安令招撫之淮南鹽運不通窮民由邵伯鎮秦蘭鎮擔負以往輒指為私販紹原設局抽釐販私者始安時鈔法大壞當百當五十錢不行當十鈔錢三七配搭鈔苦窳而制錢益少紹原先設局發票每張起五十文至三百文為度自往局中署押復設局開鑄以應支付當百當五十悉銷燬新鑄之錢質雖輕民便之冬紹原攻江浦不克七年春都統德興阿劾紹原干預保舉鑄職仍予六浦兩縣團練銜時西北捻匪猖獗勇索餉譁於南門紹原出斬一人始定三月東鄉土匪糾眾劫畧紹原往剿之五月總督何桂清上其功奏請開復原官仍留六合署江甯府事九月紹原以

捻匪日熾掘七濠東由靈巖山腳入河南通龍池西北去城三里周圍築土城高四尺十一月瓜鎮相繼克復德興阿移鎮浦口紹原請攻江浦率懷揚家幹會大軍攻江浦克之進屯七里洲惟九淤洲為賊餉道紹原遂裁撤治浦橋各營懷揚以事勒休留海州勇一隊減徐勇十之四以節軍費德興阿上江浦功紹原從優議叙八年二月賊自福建竄常山杭蘇大震桂清調六合勇往江南紹原遂謁桂清於常州將赴援浙西三月賊破和州大營結捻匪連陷全椒滁州來安浦口戒嚴初七日賊窺六合西鄙去城四十五里知縣李守誠請於桂清撤回紹原十四日紹原至六合會官軍出攻來安克之留總兵羅玉斌駐守



德興阿上其功加鹽運使銜奏充大營翼長四月候補道今四  
川總督吳棠督盱泗團練攻滁全不克馳書紹原請於德興阿  
德興阿以地非所轄卒不往五月鳳陽五河相繼陷六合迤西  
無完土秋偽丞相四眼狗定計率悍賊東下攻浦六以解江甯  
圍八月十一日官軍敗績於小店精銳失數千人浦六大震時  
紹原病甚亟請救於 欽差大臣和春叅將馮子材星夜督兵  
四千渡江來援賊以偏師綴之於江浦而以大隊攻浦口二十  
日總兵向奎率兵二千繼至營壘未立賊大進奎軍潰守浦口  
總兵安勇出援奎亦戰沒德興阿乘艇船從江上東走各營瓦  
解子材亦棄江浦回江甯紹原聞變亟議城守知縣李守誠邀

德興阿於紅山窪請移駐六合德興阿不聽遂延庶吉士唐嘉  
德往江甯求救撤富春鄧鳳林夏定邦俞承恩諸軍入城留陸  
占魁一軍於程駕橋防賊偷渡二十一日賊至龍池家幹擊之  
不克退入城賊踵至時楊升所帶壽州勇悉潰徐州勇止存其  
半紹原登南門鎗礮大舉相持至三鼓復派家幹圍焚龍津  
浮橋二十二日黎明夏定邦俞承恩至日午羅玉斌及富春鄧  
鳳林王福來哈連陞先後至紹原令海從龍督回勇守東門俞  
承恩守南門夏定邦守西門羅玉斌守北門其餘馬步隊四面  
策應二十三日北鄉九保勇悉潰是日馮子材復提兵二千至  
冶浦橋二十五日賊分兩股一由三里營繞至東北角陳於泰

山墩一由南路東抵羅星石紹原令子材鳳林抵東路家幹福  
 來抵南路富春往來策應戰甫合賊由龍窩偷渡出我軍後富  
 鄧諸軍悉潰而北至邵伯鎮子材潰而東南退守瓜洲家幹福  
 來為賊所截投水死賊遂陷儀徵天長諸州縣二十八日賊擾  
 北鄉董事方實華合村死之二十九日賊破瓜篁鋪阮悅三死  
 之四鄉皆賊紹原閉城自守九月初五日賊攻小北門定邦縋  
 城出戰賊始退賊又築月牙城內嚮環設大砲攻益急紹原募  
 能出城請救予重賞迄無應者乃釋重囚啣以利嚙血作書二  
 通一乞援於勝保勝保以六合非所轄且天長有賊不應一乞  
 援於和春時揚州先於初三日失守和春命總統張國樑由揚

州援六合以致久不至俞承恩請潰圍出奔紹原大集將士告  
 之曰賊衆援絕城中數萬性命恃我等為存亡舍之去如老弱  
 何定邦曰賊衆我寡出必不免請誓死以待援紹原曰定邦之  
 言是也敢言出者斬國樑於十五日克揚州十六日復儀徵十  
 七日與賊戰於陳板橋日已晡止焉四眼狗聞國樑至急攻西  
 北門三掘地道紹原三應之賊乃於小東門濠外掘塹穿濠搗  
 木板沈竹筏上施牛皮鼻火藥兩櫬入地道十八日寅刻藥作  
 賊蟻附上紹原巡警至東城聞變投水死子輔才以復浦口功  
 保舉縣丞城將陷紹原使之行輔才涕泣請留城陷與紹原妻  
 王氏並遇害事聞 贈紹原布政使益非勇邱雲騎尉世襲紹原投



水後知縣李守誠自縊於堂上羅玉斌至校場大呼曰我總兵  
羅玉斌也手刃數賊力竭而死夏定邦自刎於城上俞承恩墜  
城而死典史葉楸金千總海從龍同父定國千總朱金標把總  
毛國祥委員馮明本周錫先李作霖朱青雲朱廷碩朱安祺劉  
承炳榮炳陳慶榮慶華俱為賊殺孫應奎陳樹德唐嘉謨王鶴  
齡陳樹泳陸沅金蘭芳俱闔門殉難城中男丁無大小悉斃婦  
女自縊及投水者池井皆滿西北城兵勇悉戰於連家巷殲焉  
其縋城偉脫者止二百餘人

方濬頤曰予曩家居聞溫君守六合為江北諸邑之冠及至京  
師晤徐彝舟同年復道其戰功彝舟故居六合親見之言之綦  
詳迨己巳之春予由廬州赴揚州道六合阻而宿縣治欲以詩  
弔溫君索其事蹟不得悵然久之今獲董策三農部從友人處  
借鈔溫君之狀因詮次以著於篇夫使為邑令者盡如溫君則  
粵賊奚至所向無敵蹂躪幾徧天下耶張忠武來援不幸為揚  
州所牽制而六合遂陷於賊溫君死之同時殉難者一一姓名  
具在嗚呼烈已於此可知溫君平日之訓練有方而多士之馳  
驅用命也惜乎不令其親見金陵克復大難削平同膺懋賞也  
不亦大可悲哉

程烈女傳

烈女姓程氏名季玉浙江烏程人幼明慧女紅之外喜讀書史  
終日媿々無倦容少長厥父濟美僑寓吳中遂罹庚申之難父  
為賊所掠女時年十二將隨母徐及二嫂姊伯瑗仲蘭俱殉會  
父有友人降賊者來全其家遂以免居賊中三載鬱々作紀亂  
詩數百言以寫哀怨迨同治三年大軍復蘇州女食貧養母終  
以不得父消息為憾旦暮憂思嬰疾者累月一夕忽有武弁敏  
門手父書及朱提至女以白母則皆大喜武弁既去女徐々曰  
是書不類疑有他衆譙讓之武弁者虎而冠者也艷女美將以  
恩固之陰有窺室之請女察其偽堅不可武弁則率衆夜劫女



以去女乘間自縊死時同治癸亥十二月一日也舊史氏曰女  
之不死於賊奉母以全孝也孝其母安有忘其父者於是乎武  
弁起而謀之舉家不疑而女獨知其詐守身如玉畢命投繯嗚  
呼烈已不得以曩之不死議其降賊也

達回子傳

達回子佚其名六合人以其兼回人教術故相呼為回子回子  
云少好鬥多勇力性者酒醉輒與羣無賴角莫敢撻其鋒人之  
畏之如畏周處也達嗟咤曰天下烏有為丈夫者而不齒鄉里  
哉遂盡改所為益自振拔日習擊刺戰陣之法居然知兵嘗語  
所親曰天下無事則已有事則凡隸中原版圖者皆當以身報  
國也衆又異之亡何粵寇陷金陵犯六合縣令溫君紹原奇其  
材招為百夫長達感激告人曰溫公知我溫公知我戰與之騎  
辭不乘持仗步行直前奔突搏人以投所向披靡俘獲甚衆大  
府聞其名欲官之謝不受曰我以報食毛踐土恩豈貪名位耶

溫公益奇之夜輒擲於幕外屢得賊謀一日賊由小東門穴地  
以入軍民皆駭達兀立大呼曰達某在此若輩何為於是衆咸  
奮併力禦賊少郤亟填土以塞穴城復完厥後城陷於賊  
斫其首猶手磔十數人乃仆有自賊中出者說回子死難時情  
狀無不為之太息事聞祀昭忠祠卹其嗣朱銘盤曰六合人  
言達武夫目不識丁而能辭榮慕義抗節捐軀若此願夫子有  
以表之予既為溫令君作傳備書死事諸人而惜乎其遺達也  
因特書之以為多士從戎者勸

吏部侍郎胡公家傳

公姓胡氏諱肇智字季臨號霽林又號芟船績谿人曾祖某祖  
某考培翼妣氏張公於嘉慶十二年十月十八日生兄弟五人  
公齒居四三代以公貴皆贈如公官六歲入塾從大父讀書聰  
穎異常兒七歲秋仲病目失明醫者莫能治迨次年仲春兩目  
忽明舉家喜出望外嗣張太夫人病篤從里俗為長男娶婦云  
以衝喜女將嫁行及笄禮以所謂油餠者餉壻家壻家則分饋  
戚鄰太夫人病委之家人公在旁一處分悉當家人咸異之  
太夫人病旋愈公之叔父培翬公成進士官內閣中書時家中  
落大父欲令公棄儒業賈其族叔為謀宜興質庫司會計將出



門以族叔病不果往無何公之叔兄舉茂才公決計讀書不願  
服賈而公之叔祖均亭仲吉兩先生見公所作制藝告其大父  
與贈公曰是兒文有清氣可以造就宜成其志毋令改業年十  
五歲偶為張太夫人汲水墮池中時方盛夏水深滅頂無援之  
者幸池旁多石得攀而上竟不死十九歲隨中書公至京師受  
業於農部胡心原先生帖括之外教以立身行已處世待人之  
道謂凡事當返躬自克不可苛求於人學遂大進二十三歲還  
鄉應試復不售以事往二都過山下忽聞腦後風聲如雷吼亟  
回顧則見大蛇出洞長二丈許幸弗為所害歸語家人皆奇之  
二十四歲家居課童蒙讀朱子大學序至無不有以知其性分

之所固有職分之所當為二語公曰自古聖賢學問功業不過  
完此二分字初無矜伐之意而世人則不能滿假之念多實踐  
之功少蓋皆於此二分字未曾體認明白也是年補弟子員公  
先聘章氏有殘疾大父將為改婚公力持不可卒迎娶焉公之  
師邑宰朱君蘊延公課其子朱故廉吏公在署無所干求有託  
為關說訟事者公悉拒絕之朱以是益重公嘗語人曰朝  
廷設立牧令乃最親民之官民有曲直賴官判斷一經請託是  
非倒置者無論已即令曲直不爽雖公亦私豈不人已兩失乎  
屢試高等補增食餼章夫人下世繼娶洪夫人公肄業紫陽書  
院教門人日讀書所以明理非徒求名而已書理既明以之作

文則詞達以之處世則情平以之自治則身修以之待物則事  
當四書中處已接物以及齊家治國之道無所不備人能心體  
力行隨取一二章一二句皆可受用無窮予生平所服膺者惟  
性分固有職分當為八字有所不足不敢不勉其處已接物則  
以躬自厚不念舊惡君子存心等章時、體驗之遭大父喪星  
奔而歸盡哀盡禮三十歲登道先丁酉拔萃科 朝考以七品  
小京官用籤分吏部文選司行走並辦驗封司事甲辰贈公捐  
館舍公聞訃哀號欲絕冒雪履冰歸營祭奠復入都未幾還鄉  
渡黃河大風浪高數尺幾瀕於危焚香祝天風浪頓息家居讀  
禮修膳坑祖墓偕族人勸捐豐備倉穀議於宗祠內建倉廩儲

穀已酉舉發許祥和捐職偽造部照一案奉 旨下兩江總督  
按治卒得其人寘之法公以風俗虛浮仕途躁進輒與同志者  
言之太息咸豐初元充 宣廟實錄館校對官詳校官迭荷慶  
鹿瓜果之 賜書成議叙加二級嗣幫辦文選司掌印筭飯銀  
處事務補考功司主事時公年四十有八已尋擢文選司員外  
郎洪夫人歿於里第公作文寄伯子晉牲祭告之乙卯張太夫  
人壽八十公稱觴於京邸掌文選司印凡中外官陞除調補及  
班秩品級之典事最繁劇胥役衆多與各行省書役勾通舞弊  
者不一而足公志在釐奸剔弊整綱飭紀遵守成憲杜絕請託  
友朋皆不可干以私即有訾議公咸聽之胥役舞文弄法者懲



二知車草  
處不少寬貸謂同官曰今之吏部非古可比部臣職宜守法吾輩責有攸司要以例案為斷問心無媿惶恤人言凡事可以下對胥役即可以上對君親天下雖大官員雖多苟持正不阿皆無不可以對之也司中事無大小不能逃胥役之耳目稍涉於私佗人或不知先為若輩所鄙矣乙卯承修京師貢院親往督工覈減出估銀二千餘兩丙辰陞稽勛司郎中截取引見記名以繁缺知府用乞假歸省公之族人以迴龍庵后山地為庵僧盜典於程德華程故多貲欲鳴諸官公謂程鄉愚無知梟在庵僧貪財欺主盍緩之呼僧至嚴斥之使與程言利害程懼而還地其事遂寢當是時粵寇披猖前江西巡撫張公芾奉

命駐徽防剿延公入幕公辭不就以實錄全書告成議叙賞加道銜丁巳奉張太夫人命續娶洪氏三月二十一日夜二更公所居圳旁屋火起於厨家中人均睡熟賴族人啟容者自外歸有鬼遮道折而之圳旁見火狂呼公聞聲而起家人皆起即時撲滅厨近太夫人寢室火息始令太夫人知之議修族譜張太夫人尋棄養公治喪盡禮一如其喪贈公時前此展葉祁村五世祖妣墓見山地有盜典私墾者公命還業免控諸官茲復詣戴家屏展墓山亦為人盜墾公招族人偕往踏勘乃村民章觀壽等為首族人欲白有司公勸止之章觀壽等咸畏法還所墾地戊午公與閩邑紳士清理東山書院田畝收支簿籍蓋

書院之建二十餘年至是區畫甫能盡善公因賊陷金陵久罷  
試議將賓興之費助北闡公車每人五十金士林咸頌公德三  
月北上八月復南歸渡固安河見西北有彗星芒長二尺許次  
夜五更東北亦見彗星其長與西北等越十餘日東北之星不  
見而西北之星則長至丈餘其光燭天又越數日乃減行抵高  
郵聞六合被圍甚急又見揚州火起過召伯埭難民自東來者  
踵相接也因迂道金華河東北行抵里張公檄辦本邑捐輸已  
未重修節孝祠夾溪葉祁乳谿西門嶺四處祖墓或傷於水或  
傾圮坍塌皆葺治之會徽郡全境肅清補行癸丑甲寅歲科試  
公先期集宗人會課以觀其學業並籌措借浙闡鄉試經費公

與江安兩省紳士聯名請大府入告得旨先行是科績溪中  
武者七人為從來所未有云是冬服闋庚申入都鬻屋以行遽  
聞旌德失守公奉張太夫人匿厝於洪明塘公往南岸村命媵  
屬避於石井二月初一日寇至城陷初二日寇退初四日寇復  
至邑宰王峻先期遁至十三都紋川邵靜齋家而公亦至勸王  
赴郡請兵公復避寇於十四都之上西川十一日寇退至十日  
後復由歙南擾績之邊界竄往旌德公遂入都署文選司掌印  
辛酉二月擢福建汀州府知府十二月蒞任時郡城甫於四月  
克復公精選嘉應贛州勇分守各要隘同治初元壬戌浚城濠  
巡視濟川橋古城黃苔嶺嶺嶺觀音嶺一帶地方操演練丁訛



言賊至居民驚逃出示禁止之又訛言瑞金土匪自西來偵探  
並無其事乞糴於瑞金遣人往甯化請其開糴瑞金石城連界  
之地土匪嘯聚因議設防初試龍山書院繼行郡試公鑒衡至  
當士論翕然尋代理福州府事癸亥補刊先少師公全集甲子  
署理汀漳龍兵備道撰官箴云官身本是民官心須愛民如果  
恃官勢虐民虐自身又云眼前圖快意作孽禍兒孫事、捫心  
省良法在行仁公自記云後四語不獨居官當戒凡有心欺人  
者皆當以此自惕公於八月二十五日交卸道篆去漳州九月  
初五日抵會城而十九日即聞漳州失守此其中殆有天焉乙  
丑浙閩總督令湘陰相國以公籌餉得力保升道員留省提調

軍需局務尋補汀漳龍道六月抵任公論吏治云近時吏治之  
壞由於仕途之雜捐例之濫而捐例之參差瑣屑不成政體尤  
莫甚於京銅局夫捐例之設原本古人納粟之意所以廣登進  
而資糈糧也故從前捐例之開或一年而停或二年而停其條  
款祇定各官雙單月銀數以及內選外補班次簡明易曉畫一  
易遵今則捐納捐輸蟬聯十數年不能停止而條款屢更成數  
不一兼之外省各自為例銀數錢數較及錙銖幾不知開捐為  
何事矣而報捐者到處探聽便宜是驚直與市僧無異且從前  
捐例銀數一定並不減成當時報捐者非懷才欲試借捐途以  
見用即家道殷實得名器以為榮今則忽減忽增名器至濫非

二知縣  
特無行之人希僥倖以入仕即窮途之子亦那借以求名皆視  
官場為利藪並不知國計民生為何事如此而欲吏治之有起  
色也得乎况銀數既有增減即選補班次亦因之變更無論計  
較錙銖有傷政體而章程屢改條款愈繁記憶既難檢查匪易  
稍有疎忽百弊叢生以致開捐數十年而經費仍不足吏治日  
益壞其效可觀矣為今之計欲祛弊端先務刪例欲刪捐例須  
復舊章條款簡明廣登進仍杜倖進銀數畫一資糈糧即可足  
糧斯仕途可以清釐而名器不致冒濫必如此始可以言吏治  
八月擢陝西按察使丙寅四月抵西安公先與紳士議保甲事  
宜尋奉順天府尹之命陝西撫臣疏請留任一月清理案

續丁卯遷宗人府丞兼署府尹迭奉廷寄豫籌荒政剿辦  
梟匪公以病請假十日病痊銷假請安召見兩宮皇太后  
垂詢畿輔賑務鹽梟情形公奏對稱旨充順天鄉試監臨官  
復充武闈鄉試監臨官派列字圍較射擢吏部右侍郎管理戶  
部三庫事務戊辰復兼署順天府尹以夏歿甫先生所著聖  
諭十六條附律易解及檀弓辨誣述朱質疑各書進呈乙覽  
購得叔祖竹村公儀禮正義版刷印行世已已調補吏部左侍  
郎時公已屢病乞假至是奏請開缺奉旨賞假兩月假滿復  
請開缺又奉旨賞假兩月並著加恩在紫禁城內騎馬是年  
重刊高祖樸齋公儀禮釋官次年公復病三次賞假六箇月



並迭賜食品辛未六十五歲五月復奏請開缺奉旨俞允  
旋於六月十六日薨遺疏上聞九重震悼賜卹如例公子  
五人晉姓晉萊晉萱晉葉其五晉葵側室張孺人出公長身玉  
立言笑不苟動必以禮法自持尤篤於師友之誼在銓部日劄  
正廉明為上官所倚重晚歲荷特達之知由外臺掌京兆擢  
少宰朝廷嚮用方殷公感三朝知遇雖躋卿貳無異卑寒  
力疾從公以身報國屢荷恩旨慰留公亦義不忍去向使天  
予耄耋之年則其所設施者詎止於此也哉  
方濬頤曰公與先叔父曉林公為丁酉同年生而友蘭先兄亦  
於是科舉京兆予官京師公折節下交待以儕輩之禮朝夕過

從公之倏不羣予固久心欽之及來揚州公入為六官之長  
位望尊崇猶不忘春明故交時通尺一道殷勤有古君子風所  
期勉於予者倍至每南中人士入都必詢予近狀嗚呼孰知竟  
不獲再見耶其孤晉姓服除以浙江候補知府過邗上持公自  
訂年譜見眎乞作家傳謹詮次如左公之學問經濟超越尋常  
斯固未足以盡之願就公所自言者列諸家乘其信今而傳後  
也初非予一人之私言也

贈道銜候補同知王君博泉家傳

君姓王氏諱治溥字厚伯號博泉零陵人曾祖暉祖在綬父金

臺三世舉茂才有名德以君弟治覃貴累贈榮祿大夫妣皆

贈一品夫人君兄弟三人齒居長嘉慶九年六月十五日生幼

而岐嶷好讀書母唐太夫人愛憐之欲寬其課程君學益奮弱

冠應試冠其曹補弟子員道光丁酉登拔萃科就職直隸州

判分發廣東上官知其才命讞獄曲直胥當二十年攝新甯縣

事甫三月頌聲翕然民感其德時兩廣總督林文忠公疏請焚

燒雅片人情洵率畏足不前君獨毅然督兵役入十三洋行

搜獲雅片數百萬斤投諸火文忠大奇之既而海上戒嚴君隨

*[Faint bleed-through text from the reverse side of the page]*



諸大府治軍奏疏文移皆出君手虎門香海番舶絡繹而至巡  
河之役無敢應者君則不避艱險以身任之亡何勢益張城外  
飛礮墜某大帥營中大帥登陴君戎裝以隨止之不可則礮轟  
益烈城幾破大帥懼事不可為將自裁君急前陳大義大帥為  
之改容移時寇果退事平大帥偕督撫臣獎其勞入告奉 旨  
免補本班以應升之缺升用二十二年權德慶州牧地當西江  
之衝盛夏霖雨江水漲溢城不沒者三版君偕衆避居高阜水  
久不退君召吏卒持火器以厭之水應時而退民皆以為精誠  
所感云歲科兩試君躬自校閱所拔皆知名士嗣攝篆揭陽有  
戴毓祥者冒三合會曾亞三名與潮陽之王悟空並為酋長城

鄉設會壇無慮千百所潮揭普甯三邑富家大族搢紳胥吏以  
及赤貧無賴者咸與勾結交通表裏為奸號雙刀會殺掠無虛  
日舊令尹不敢過問君下車見城垣崩圯即率邑人捐金脩治  
之決旬而畢將窮治會黨毓祥與悟空因揚言糾衆攻城劫獄  
城守兵僅數十人君聞變募壯勇二百兵力固未足而城中與  
會之人又恐捕治惶 不自安於是官拘與會子弟可獲  
重金助餉請者君聞之駭然虞其激變佯諾之立屏左右與幕  
客密繕告示數十紙翌日榜通衢云罪在渠魁脅從罔治將所  
獲會匪簿籍焚之城 中歡聲如雷越日君出郭巡哨夜未歸士  
民懼其遇賊也相率持器械張鎧迓君於數十里外君知民情

之大可用也乃進父老而令之曰戶出一丁石一囊荷戈守陴  
又伐巨竹為礮入藥二升鐵彈徑寸號為竹將軍咄嗟得百十  
具嚴陣以待十一月丁亥夜賊將至邏卒擒其偽先鋒黃延榮  
究詰得狀則之與先獲之鄭阿蓀等並檻送於潮黎明賊至大  
霧四塞遠近莫辨城上礮聲火光震疊閃灼賊不敢犯比夜復  
至以飛礮竹梯竭力仰攻城上矢石如雨而竹將軍亦同時轟  
擊殲賊無算賊潰而援軍亦先後至賊盡退分途感之餘黨悉  
解散乃撤兵君不入內寢者凡數十日或問之曰慮為兒女輩  
所牽制也兵既息忽奉大府檄以匪黨供稱城中富紳陳氏實  
與謀有為君畫策者曰陳氏擁資百萬為一邑冠若召之來示

以大府檄尚何憂虧空乎君諾客退則據實上陳以修繕城垣  
陳紳倡捐三千金洵屬急公好義豈冒通賊為力辯其誣事遂  
寢闔邑稱頌於韓文公祠側設長生位以祀之陳氏與焉而實  
不知有大府之檄也以功補海陽縣知縣、瀕海隄工最要自  
道光十三年大水決隄前邑宰請於上官貸公帑數萬於市民  
取其息為歲修之費日久虧毋民苦不能償而追呼者不絕於  
道君閱之請以廉俸分年代完民欠至於育嬰堂則捐貲添雇  
乳婦凡可以濟人利物者皆為之恐後為治海陽一如其官揭  
陽時二十九年調赴英德清遠大營襄理軍務每獲一匪必虛  
心研鞫無枉無縱是冬部議以同知儘先補用咸豐元年卸海



陽任二年權潮陽事番舶來泊於放雞山下寄柁搭棚將作久  
遠計居民皇恐君禁之不聽因偕達濠營弁兵冒風濤親往逐  
之三日番舶駛去在潮陽才四十七日民至今猶稱之嗣隨剿  
廣西梧州艇匪事竣復隨福軍門某至湖南北督辦支應總局  
每戰必與洪山之捷君匹馬抵城下距賊營僅十里許見者皆  
驚或勸之曰衝鋒陷銳非書生分內事設有不測奈何君曰自  
從軍梧州以來豈盡恃將士力者如子言天下事尚可為乎三  
年回潮陽任先是東莞土匪嘯聚於鐵岡司馬鄉大府已委員  
剿辦聞君至會城改令君往君慨然就道雖南海缺出輪委及  
之君不顧也九月初七八日連獲勝仗初九日前隊失利後軍

爭覓小舟以遁君匹馬督戰轉敗為勝初十日病不起十二日  
甫瘥十三日晨起即督勇進剿身先士卒賊所向披靡焚其巢  
窮追不已卒陷於伏又以新病久戰賊圍之數重力竭遇害義  
僕戴興實左右之先以身殉事聞奉旨追贈道銜入祀廣州  
永州兩府昭忠祠予雲騎尉世職公配黃恭人繼配張恭人子  
二植英廣西候補通判植篤江蘇候補府經歷出嗣胞弟治典  
為後女三長適劉次適魏三適唐

方濬頤曰予初不識君與君弟子敷觀察為道義交子敷亦從  
軍久見重於曾文正公今合肥相國頤老而耆古高尚林泉將  
返三湘暫居邗上避暑時相過從日者出君狀乞余為作家傳

予受而讀之君作宰嶺南廿餘年有撥亂之才有應變之智以少勝多而能使民為官用以廉行惠而樂於官補民虧雖古循吏不是過焉鐵岡之役鼓勇直前以身報國論者謂君不聽或人之勸卒罹於難似非明哲保身之道於戲是烏知忠臣義士視死如歸甘蹈鋒刃而不悔者之與日月爭先也哉

嘉興朱氏庚垣穎艘兩先生合傳

朱氏世為婺源望族自兩先生之大父臨溪公諱日豐者少時賈於嘉興二十餘稔積貲至三百餘萬有子六人命長子與四五子居婺源二三子與六子居嘉興為朱氏遷浙之始六子天錕號啓霞生孫三人伯為庚垣先生諱階吉仲為穎艘先生諱達吉兩代以伯仲貴皆贈中議大夫妣皆贈淑人初臨溪公居永命二三子應童子試永中士人以其冒籍也攻之甚力故屢試皆被放乾隆十年臨溪公回婺源展墓至家塾見塾師詢為孝廉訝其何以不與計偕塾師以貧對問需幾何曰非百金不可明日如數贖之塾師欣然就道即於是科大魁天下蓋常州錢



文敏公維城也後文敏視學浙江兩先生之伯父方具牘求試  
文敏坐堂皇諭諸廩生曰朱某固是皖產第遷居嘉興置田產  
已廿年之久例應著籍汝輩奚嘆、為文敏之報臨溪公若此  
朱氏至今德之啟霞秉先人訓樂善好施孳、不倦每於歲暮  
日夕入市一僕囊錢以隨見有繩樞甕牖啼飢號寒者於門隙  
中擲錢予之二十年如一日鄉里稱道勿衰云庚垣先生、於  
乾隆丙申五月初六日幼穎異讀書日十行下八歲能詩十四  
補弟子員天性孝友失怙之後諸質庫率折閱家中落客有挾  
三千金鬻貸吳門者不數日舟子踉蹌而歸云中途胠篋一空  
客屢求死特來告先生之母汪太淑人謂先生曰失貨事小人  
命事大勿問事之虛實汝盍往安其心嗚呼可謂賢母已先生  
季弟世溥為庶母郭太安人出汪太淑人尤珍愛之年十八應  
縣府試皆冠軍院試又居首選人呼為小三元越一年下世汪  
太淑人哭之慟先生與弟各以一子為之嗣太淑人憂始解先  
生下帷攻苦博覽羣書於岐黃風鑑星命家言靡不通曉讀書  
每有心得輒筆之簡端丹黃爛然工帖括及古今體詩有時文  
塾課及晨葩書屋律賦試帖雜著刊行於世嘉慶庚申舉於鄉  
從游者日衆屢上春官不第辛未丁太淑人憂服闋甲戌偕其  
弟穎艘先生公車北上忽動思親之念潸然下涕抵袁浦小極  
決計南歸穎艘為同行者牽帥入都即於是科以第二名捷禮

聞入翰林先生喜曰是足以仰慰親心我可終老林泉矣丁丑  
穎艘入都散館力請先生偕行又以第二名成進士改庶吉士  
都人士咸以郊祁軾轍目之庚辰散館授編修奏辦院事本衙  
門撰文充國史館提調實錄館纂修道先辛巳簡放廣  
東學政謝恩召見宣廟曰廣東考試積弊最重知汝廉  
潔特命汝往汝當秉公校閱力除積弊毋負委任先生感九  
重知遇力圖報稱時歲試已畢舉行科試按臨諸郡雖有幕賓  
襄校取舍悉由自主馭吏役不惡而嚴故事督學使者騶從極  
盛先生減之不及曩日四分之一兩廣總督阮文達公見之歎  
曰大有劉文正遺風廉潔二字足副天語褒嘉矣壬午閏三

月十二日卒試士僅八閱月弊絕風清衆論翕然惜乎年未及  
艾海內皆為先生痛為先生子五長廷珍辛巳舉人餘杭縣教  
諭次瑛增監生次寶誠恩貢生候選知縣嗣其弟次兆璜增貢  
生候選訓導次瑞清廩貢生候選訓導孫八曾孫四穎艘先生  
生於乾隆戊戌小庚垣二歲事兄維謹年十六舉茂才弱冠食  
餼直秋試啟霞公挈兩先生赴杭州穎艘先生患痢甚劇先遣  
家人送歸啓霞公鬱不樂薄暮散步街頭見丐者卧橋下奄  
奄一息問所苦餌以藥既又覓人掖丐者宿古廟中詰朝往視  
之則已死矣有兩丐哭於側則其妻與子也市棺瘞丐予其子  
青蚨兩貫為生計毋再行乞而先生歸家痢更甚轉為噤口不



言不食羣醫束手一夕歎見老瘦偃偻而入及床以手按摩胸  
腹良久沈沈睡去至曉所患若失以語家人謂其嚙語漫應之  
俄腹飢進粥兩甌數日而瘳啟霞公歸詢老瘦狀儼然橋下丐  
也嘉慶甲子舉於鄉甲戌入翰林散館以知縣用選江西東鄉  
縣勤於治獄斷決如神直頻年旱勞力請寬免賦稅上官屢駁  
斥之乃躬詣會城面陳民間疾苦時江西巡撫為秀水錢公某  
素重先生如所請入告允之先生慨然曰歲凶如此民病如  
此賴上官同鄉里乃獲如所請司牧尚可為乎己卯充鄉試同  
考官試事畢以病乞歸上官再四慰留公不顧也歸而構屋三  
楹蒔花種竹讀書其中將有終焉之志會邊陲不靖戶部開捐

例以助餉糈庚垣先生為先生改捐內閣中書趣之北上先生  
以兄命不敢辭到閣行走尋考取軍機章京補中書擢戶部主  
事遷員外郎時回疆多事軍書旁午先生票擬敏捷悉稱上  
旨以功加隨帶六級戶部事繁劇例案叢雜紛歧先生一目了然  
然吏不能欺某司中有老吏作奸犯科諸臺諫欲糾之而未發  
大司農某公知先生才命兼掌某司稽核月餘而得老吏不法  
十餘事白大司農按治如律由是羣小銜之構造蜚語大司農  
置不問而先生亦陞陝西道監察御史矣嗣轉掌京畿道遷禮  
科給事中旋掌工科稽查銀庫先生在諫垣久封事嘗數十上  
凡有關於吏治民生者敷陳無隱彈劾不避權要朝伏蒲而夕

焚其草曰非以沽直也而其見於邸抄者如湖北水災請疏濬  
江漢支河以工代賑湖北咸甯配犯萬四寶嘯聚匪徒數百人  
編列字號分擾大冶蒲圻武昌通山嘉魚等縣請嚴拏懲辦以  
靖地方吏部司員認引例案選用道員四川攤派津貼州縣藉  
端擾民皆自先生發之均如所請行乙酉戊子兩充順天鄉試  
同考官癸巳充會試同考官遼秀水汪太史世樽因病出闈大  
總裁某公知先生與汪為中表命先生兼閱汪所分試卷得士  
四十餘人狀元汪鳴相探花蔣元溥併出先生門下士林咸艷  
稱之乙未拜廣東糧儲道之命宣廟召見問在軍機處  
幾年對曰七年問曾領班否對曰領班三年宣廟曰當過

領班學問必好明日到軍機處領旨次日詣軍機處軍機大臣  
授以密緘云奉上面諭汝到廣東會同督撫開看先生祇領  
南下抵廣東會城隨同督撫開讀未幾即聯銜奏復事祕莫能  
知先生甫任監司荷朝廷倚重若此蓋其平日之公忠弼亮  
早已上聞於九重矣糧道兼筦水利丁酉夏大雨佛山一  
帶山水盛漲田廬淹沒先生乘舟往勘災舟至中流為怒濤所  
擊輒退數里從者皆失色先生不為動卒抵基圍督令防築宣  
洩幸不成災先是大洲沙在南海良鑿圍三水沙頭圍之外兩  
縣居民爭佃官為封禁道光五年三水紳士陳請開墾以坦租  
充書院膏火由邑令白大府從之閱十餘年南海良鑿圍紳士



控其有礙基圍仍請封禁繼又請以原封田畝斷歸南海以資  
疏浚案懸未結先生訪明此坦本在三水界內原與基圍無礙  
南海民見其成熟年久安生覬覦因判曰兩圍各有水涌從無  
衝決而於二十年成案輕議更張開墾之功本誰償書院之供  
支誰給乎其令三水士民照例升科於書院內增肄業生添給  
膏火另籌款存縣以備疏涌之費士民悅服後先生靈輒歸浙  
道三水士民詣舟拜奠並奉粟主於書院歲時饗祀勿衰是年  
秋充廣東鄉試提調官遣監臨巡撫某公有疾事無巨細屬先  
生主持先生悉心稽察勤勞備至八月初十日晨興巡綽官於  
甬道見有人形跡可疑搜之得試卷白先生先生懷其卷語巡

綽官曰此人汝管而逐之出試卷待吾自問別命巡綽官至某  
號呼某生來詰以試卷安在曰尚未謄完曰即未完卷先取一  
看某生皇恐變色曰汝卷已在吾懷中姑貸汝勿究其他又廉  
得舞弊者數人皆保全之曰斯文不可不重也揭曉後十月卒  
於官子二長某先歿次士楨同知銜四川候補知縣出嗣其弟  
孫五曾孫三

方濬頤曰予官京師夙聞浙中士大夫嘖嘖道兩先生名推為  
詞館模範惜予生也晚不獲修後進之禮以相見也及來揚州  
庚垣先生之孫恩緒以諸生需次兩淮予延之入幕掌書記有  
年溫文爾雅間詢其家世則出兩先生事狀乞予為作合傳予

惟兩先生先後以翰林起家一則視學粵東一則觀督嶺南相  
距十五年之久願皆未竟厥施幾疑天之報施或爽已然而文  
章經濟卓絕一時積德累仁必昌厥後嗚呼若兩先生者近今  
以來殆罕有其匹哉

惟兩先生先後以翰林起家一則視學粵東一則觀督嶺南相  
距十五年之久願皆未竟厥施幾疑天之報施或爽已然而文  
章經濟卓絕一時積德累仁必昌厥後嗚呼若兩先生者近今  
以來殆罕有其匹哉





